

T 7970/2240 (4)



CHINESE - JAPANESE LIBRARY  
HARVARD - YENCHING INSTITUTE  
AT HARVARD UNIVERSITY

MAR 24 1958



神農本草經疏卷之三

玉石部上品

總七十三種今疏其要者一十四種

丹砂

雲母

石鍾乳

礬石

芒硝

朴硝

玄明粉

滑石

空青

紫石英

赤石脂

無名異

綠礬

鐵繡

哈佛大學哈佛燕京  
圖書館珍藏印



丹砂味甘微寒無毒主身體五藏百病養精神  
安魂魄益氣明目通血脉止煩滿消渴益精神  
悅澤人面殺精魅邪惡鬼除中惡腹痛毒氣疥  
癩諸瘡久服通神明不老輕身神仙能化爲汞  
作末名真朱光色如雲母可析者良

惡磁石  
畏鹹木

疏○丹砂本稟地二之火氣以生而兼得乎  
天七之氣以成色赤法火中含水液爲龍爲  
汞亦曰陰精七爲陽火之少故味甘微寒而

無毒蓋指生砂而言也藥性論云丹砂君爲  
清鎮少陰君火之上藥辟除鬼魅百邪之神  
物安定神明則精氣自固火不妄炎則金木  
得平而魂魄自定氣力自倍五臟皆安則精  
華上發故明目心主血脉心火寧謐則陰分  
無熱而血脉自通煩滿自止消渴自除矣殺  
精魅邪惡鬼除中惡腹痛者陽明神物故應  
辟除不祥消散陰惡殺厲之氣也久服通神



明不老者古之真人飛丹煉石引納清和配  
以金鉛按之法象自能合丹道而成變化也  
青霞子及太清服煉靈砂法云能重能輕能  
暗能明能黑能白能神能靈一斛人擎力難  
舉升萬斤遇火輕速上騰鬼神尋求莫知所  
在先稟氣於甲受氣於丙出胎見壬結魄成  
庚增光歸戊陰陽升降各本其原非虛語矣

主治參方

丹砂研飛極細令狀如飛塵以甘草生地黃  
濃煎調分許與兒初生時服之能止胎驚解  
胎毒 同真珠琥珀金箔牛黃生犀角天竺  
黃滑石末治小兒急驚有神 入六一散治  
暑氣伏於心經神昏口渴及泄瀉如火熱  
入補心丹鎮心神定魂魄 入乳香托裏散  
散癰疽熱毒發熱疼痛及毒氣攻心發譫語

簡誤

記看



丹砂爲八石之主故列石部之首體中含汞  
汞味本辛故能殺蟲殺精魅宜乎藥性論謂  
其有大毒若經伏火及一切烹煉則毒等砒  
礪服之必斃自唐以來上而人主下而縉紳  
曾餌斯藥鮮克免者戒之戒之

雲母味甘平無毒主身皮死肌中風寒熱如在  
車船上除邪氣安五藏益子精明目下氣堅肌  
續絕補中療五勞七傷虛損少氣止痢久服輕

身延年悅澤不老耐寒暑志高神仙一名雲珠

色多赤一名雲華五色具一名雲英色多青一

名雲液色多白一名雲砂色青黃一名磷石色

正白

澤瀉爲之使忌羊  
血用礬石則柔爛

疏○雲母本經載其味甘氣平詳其主治亦  
應有溫韓保昇曰雲母色白而主肺此石藥  
中溫良之品也以其法金故主身皮死肌及  
中風寒熱如在車船上甘能緩溫能和故除



邪氣石性鎮墜能使火下火下則水上是既  
濟之象也故安五臟益子精明日久服輕身  
延年別錄主下氣堅肌續絕補中療五勞七  
傷虛損少氣久服悅澤不老耐寒暑志高神  
仙皆此意也其曰止痢者久痢則腸胃俱虛  
甘溫足以回其虛下墜足以去其積故亦主  
之也

主治參互

雲母得鉛丹熬成膏可貼一切癰疽瘡毒和  
以昇丹細末更著奇效 經驗方云青城山  
丈人觀主康道豐治百病雲母粉方用雲母  
一斤析開揉入大瓶內築實封固以十斤頂  
火煨赤取出却拌香芎紫連翹草二件合搗  
如泥後以夾絹袋盛於大木盆內搖取粉餘  
滓未盡再添草藥重搗取粉以木盆一面貯  
灰於灰上印一淺坑鋪紙傾粉在內候乾焙



之以麩糊丸梧子大遇有疾者服之無不效  
知成都府辛諫議曾患大風衆醫不愈道豐  
進此服之神驗 千金方服食雲母法上白  
雲母二十斤薄劈以露水八斗作湯分半淘  
淨二次又作二斗湯納芒硝十斤木器中浸  
二十日取出絹袋盛懸屋上勿見風日令燥  
以鹿皮爲囊採之從旦至午篩滓復採得好  
粉二十斤攪糊入竹筒內薄削封口漆固北

垣南下入地六尺覆土春夏四十日秋冬三  
十日出之當成水若洞洞不消更埋三十日  
此水能治萬病及勞氣風疼每以溫水一合  
和服之日三服十日小便當變黃二十日腹  
中寒澀消三十日齟齒更生四十日不畏風  
寒五十日諸病皆愈顏色日少長生神仙  
深師方治痰飲頭痛往來寒熱雲母粉二兩  
鍊過常山一兩爲末每服方寸匕湯服取吐



忌生芴生菜 仲景金匱方治牝瘡多寒雲  
 母燒二日夜龍骨蜀漆燒去腥等分爲末發  
 前漿水服半錢 千金方治赤白久痢積年  
 不愈飲調雲母粉方寸匕服神效 又方治  
 婦人帶下水和雲母粉方寸匕服神效 積  
 德堂方治婦人難產經日不生雲母粉半兩  
 溫酒調服入口卽產不順者卽順萬不失一  
 陸氏云此是何德揚方也已救三五十人

千金方治風癩遍身百計不愈煨雲母粉清  
 水調服二錢良 又方治一切惡瘡用雲母  
 粉傅之 聖惠方治火瘡敗壞雲母粉和生  
 羊髓傅之 事林廣記治金瘡出血雲母粉  
 敷之絕妙 千金翼治風熱汗出水和雲母  
 粉服三錢不過再服立愈

簡誤

雲母性雖甘平終屬石種與臟腑氣血實非



同類祇宜用以治病取效若夫益精明目輕身延年耐寒暑志高神仙皆必不然之論也姑俟世人試過乃敢信耳

石鍾乳味甘溫無毒主欬逆上氣明目益精安五藏通百節利九竅下乳汁益氣補虛損療脚弱疼冷下焦傷竭強陰久服延年益壽好顏色不老令人有子不煉服之令人淋

紫石  
英

蛇床為之使  
惡牡丹玄參

疏○石鍾乳稟石之氣而生本經謂其味甘氣溫無毒吳普曰神農辛斯言近之甄權以為有大毒或是經火之故應云味甘辛氣大溫其性得火則有大毒乃為得之其主欬逆上氣者以氣虛則不得歸元發為斯證乳性溫而鎮墜使氣得歸元則病自愈故能主之也通百節利九竅下乳汁者辛溫之力也療脚弱疼冷者亦是陽氣下行之驗也甄權主



寒嗽通聲者辛以散邪結溫以祛寒氣故也  
其他種種補益之說當是前人好事者溢美  
之辭夷考其性恐無是理未足信也

主治參互

石鍾乳得牛黃白蠟象牙末真珠乳香沒藥  
樺皮灰龜板灰俱存性細研枯白礬蛙竹屑  
紅鉛治廣瘡結毒爛壞鼻梁及陰蝕陽物有  
神 孫真人千金翼鍾乳煎治風虛勞損腰

脚無力補益強壯用鍾乳粉煉成者三兩以  
夾絹袋盛之牛乳一大升煎減三之一去袋  
飲乳分二服日一作不吐不利虛冷人微澹  
無所苦一袋可煮三十度力盡別作袋每煎  
訖須濯淨令通氣其滓和麩煨雞子食之此  
崔尚書方也 宣明方治一切勞嗽胸膈痞  
滿焚香透膈散用鵝管石雄黃佛耳草款冬  
花等分爲末每用一錢安香爐上焚之以筒



吸煙入喉中日二次 聖濟錄治肺虛喘急  
連綿不息生鍾乳粉光明者五錢蠟三兩化  
和飯甑內蒸熟研丸如梧子大每水下一丸  
外臺秘要治乳汁不通氣少血衰脉澀不  
行故少乳煉成鍾乳粉二錢濃煎漏蘆湯調  
下或通草等分爲末米飲服方寸七日三服  
簡誤

石鍾乳辛溫若加火煅有毒無疑縱治虛寒  
尚須審察况病涉溫熱者耶世人病陰虛有  
熱者十之九陽虛內寒者百之一是以自唐  
迄今因服鍾乳而發病者不可勝紀服之而  
獲效得力者不聞一二其於事理可以燭照  
經曰石藥之性悍味斯言也則其大畧可槩  
見已慎毋輕信方士之言致蹈前人覆轍尊  
生之士宜安常處順以道理自持脩短有命  
無惑乎長年之說庶不爲其所誤矣



礬石味酸寒無毒主寒熱洩痢白沃陰蝕惡瘡  
目痛堅骨齒除固熱在骨髓去鼻中息肉煉餌  
服之輕身不老增年岐伯云久服傷人骨能使

鐵為銅生河西山谷及隴西武都石門甘草為之使惡

牡蠣畏麻黃

疏○礬石味酸氣寒而無毒其性燥急收澀  
解毒除熱墜濁蓋寒熱洩痢皆溼熱所為婦  
人白沃多由虛脫澀以止脫故也陰蝕惡瘡

亦緣溼火目痛多由風熱除固熱在骨髓堅

齒者髓為熱所劫則空故骨痿而齒浮礬性

入骨除熱故亦主之去鼻中息肉者消毒除

熱燥溼之功也

主治參互

礬石即白礬得巴豆同煨令枯取礬研末以

鵝翎管吹入喉中流出熱涎立解喉痺其證

俗呼為纏喉風是也 皮膚疥癬膿窠坐板



肥瘠等瘡皆資其用各合所宜以施之得  
 硫黃黃白附子海金沙蜜陀僧擦汗斑殊  
 效一年者去皮一次十年者去皮十次擦後  
 坐卧勿當風勿行房搖扇制半夏能散溼  
 痰及食積痰兼除五飲同芒硝可燒水銀  
 成粉治一切瘡中有蟲得黃蠟和丸名蠟  
 礬丸治一切腫毒有神凡治癰疽常服之以  
 護膜膜苟不破雖劇必瘥陳師古方中風

痰厥四肢不收氣閉膈塞者白礬一兩牙皂  
 角五錢為末每服一錢溫水調下吐痰為度  
 簡要濟眾方牙齒腫痛白礬一兩燒灰大  
 露蜂房一兩微炙每二錢水煎含漱去涎  
 千金方鼻中息肉用明礬一兩蓖麻仁七粒  
 鹽梅肉五箇麝香一字搗丸綿裹塞之化水  
 自下也夏子益奇疾方發斑怪證有人眼  
 赤鼻張大喘渾身出斑毛髮如銅鐵乃熱毒



氣結於下焦也白礬滑石各一兩為末水三  
 盥煎減半不住服盡即安 永類鈴方爛弦  
 風眼白礬煨一兩銅青三錢研末湯泡澄清  
 點洗 千金方脚氣衝心白礬三兩水一斗  
 五升煎沸浸洗 張仲景金匱方女勞黃疸  
 日晡發熱而反惡寒膀胱急少腹滿目盡黃  
 額上黑足下熱因作黑疸其腹脹如水狀大  
 便必黑時澹此女勞之病非水也自大勞大

熱交接後入水所致腹滿者難治用礬石燒  
 消石熬黃等分為散以大麥粥汁和服方寸  
 七日三服病從大小便去 又金匱方婦人  
 白沃經水不利子臍堅癖中有乾血下白物  
 用礬石燒杏仁一分研勻蜜丸棗核大納入  
 腸中日一易之 千金翼婦人陰脫作痒礬  
 石燒研空心酒服方寸七日三 劉禹錫傳  
 信方蛇咬蝎螫燒刀矛頭令赤置白礬於上



十三  
汁出熱滴之立瘥此神驗之方也

簡誤

白礬本經主寒熱洩痢此蓋指洩痢久不止  
虛脫滑洩因發寒熱礬性過澀澀以止脫故  
能主之假令溼熱方熾積滯正多誤用收澀  
爲害不一慎之婦人白沃多由虛脫故用收  
澀以固其標終非探本之治目痛不由弩肉  
及有外障亦非所宜除固熱在骨髓僅可資

其引導若謂其獨用反有損也礬性燥急而  
能劫水故不利齒骨齒者骨之餘故也岐伯  
云久服傷人骨故凡陰虛內熱火熾水涸發  
爲咽喉痛者不宜含此目痛由陰虛血熱者  
亦不宜用劫水損骨之藥豈可煉服輕身不  
老增年徒虛語耳

芒硝味辛苦大寒主五藏積聚久熱胃閉除邪  
氣破留血腹中痰實結搏通經脉利大小便及



月水破五淋推陳致新生於朴硝

疏○芒硝稟天地至陰極寒之氣所生故味苦辛性大寒乃太陰之精以消物爲性故能消五金入石况乎五臟之積聚其能比之金石之堅哉久熱卽是邪熱傷寒熱邪結中焦或停飲食則胃脹閉少少投之可立蕩除除邪氣者寒能除熱故也破留血者鹹能軟堅辛能散結也邪熱盛則經脉閉熱淫於內治

以鹹寒結散熱除則經脉自通二便自利  
水復故五淋中惟石淋膏淋爲膠結難解病由於積熱非得辛苦大寒之藥以推蕩消散之不能除也推陳致新總述其體用之功耳  
由朴硝再煎而成故曰生於朴硝

主治參互

入仲景大承氣湯治傷寒七八日後邪結下焦少腹按之堅痛下之愈 又治傷寒邪熱



失汗蓄血少腹或先因內傷留血下焦入桃  
仁承氣湯下之愈 千金方療漆瘡用湯漬  
芒硝令濃塗之如乾卽易之 子母秘錄治  
小兒赤遊行於體上下至心卽死以芒硝納  
湯中取濃汁以拭丹上 百一選方治療關  
格大小便不通脹滿欲死兩三日則殺人以  
芒硝三兩紙裹三四重炭火燒之令內一升  
湯中盡服當先飲湯一升已吐出乃服之

孫真人食忌主眼有翳取芒硝一大兩置銅  
器中急火上煉之放冷後以生絹細羅點眼  
角中每夜欲臥時一度點妙 姚和衆方治  
小兒重舌馬牙硝塗於舌上下三日效 簡  
要濟衆方治小兒鵝口用馬牙硝擦舌上日  
五度效 梅師方治火焰丹毒水調芒硝末  
塗之 信效方治死胎不下用芒硝末二錢  
童便溫服 三因方治風熱喉痺及纏喉風



玉鑰匙用焰硝一兩半白殭蠶一錢白礪砂半兩腦子一字研勻取少許數數吹之 普濟方治重舌鵝口用竹瀝同焰硝點之

朴硝味苦辛寒大寒無毒主百病除寒熱邪氣逐六府積聚結固畱癖胃中食飲熱結破畱血閉絕停痰痞滿推陳致新能化七十二種石煉餌服之輕身神仙煉之白如銀能寒能熱能滑能澀能辛能苦能鹹能酸入地千歲不變色青

白者佳黃者傷人赤者殺人

疏○朴硝乃初次煎成者其氣味烈於芒硝主治皆同總為除邪熱逐六腑積聚結固畱癖胃中食飲停滯因邪熱結停痰痞滿破畱血閉絕之要藥與芒硝功用曾無少別文具芒硝條下茲不復疏

主治參互

聖惠方治時氣頭痛不止用朴硝二兩搗羅



爲散用生油調塗於頂上 又方治乳石發  
動煩悶及諸風熱用朴硝煉成者半兩細研  
如粉每服以蜜水調下一錢七日三四服  
簡要濟衆治小便不通膀胱熱白花散朴硝  
不以多少研爲末每服二錢七溫茴香酒調  
下無時服 入紫雪療傷寒溫疫溫瘧一切  
積熱煩熱狂呼叫走瘴疫毒癘卒死脚氣五  
尸五注心腹諸疾疔刺切痛解諸熱毒邪熱

發黃蠱毒鬼魅野道熱毒小兒驚癇百病黃  
金一百兩石膏寒水石磁石滑石各三斤搗  
碎水一斛煮四斗去滓入犀角屑羚羊角屑  
青木香沉香各五兩玄參洗焙升麻各一斤  
炙甘草八兩丁香一兩入前汁中煮取一斗  
五升去滓入煉朴硝十斤消石三十二兩於  
藥汁中微火煎之用柳木不住攪至水氣欲  
盡傾水盆中待欲凝入麝香一兩二錢半硃



砂末三兩攪勻收之每服一二錢凉水服臨  
時加減甚者一兩 碧雪治一切積熱天行  
時疾發狂昏憤或咽喉腫塞口舌生瘡心中  
煩躁或大小便不通胃火諸病朴硝芒硝馬  
牙硝硝石石膏水飛寒水石水飛各一斤以  
甘草一斤煎水五升入諸藥同煎不住手攪  
令消鎔得所入青黛一斤和勻傾盆內經宿  
結成雪爲末每含嚙或吹之或水調服二二

錢欲通利則熱水服一兩 劉禹錫傳信方  
治熱壅甘露飲涼胸膈驅積滯芒硝末一大  
斤用蜜十二兩和勻入新竹筒內半筒已上  
卽止不得令滿却入炊甑中令有藥處在飯  
內其虛處出在上蒸之候飯熟取出綿濾入  
磁鉢內竹篦攪勻勿停手待凝取入磁盒每  
臥時含半匙漸漸嚙之如要通利卽多服之  
簡便方治赤眼腫痛朴硝置豆腐上蒸化



取汁收點 外臺秘要治喉痺腫痛用朴硝  
一兩細細含嚙立效或加丹砂一錢氣塞不  
通加生甘草二錢半吹之 孫真人方治口  
舌生瘡用朴硝含之良 夏子益奇疾方灸  
瘡飛蝶因艾灸火瘡痂退落瘡內鮮肉片子  
飛如蝶狀騰空飛去痛不可言是血肉俱熱  
怪病也用朴硝大黃各半兩爲末水調下微  
利卽愈 史記倉公傳云菑川王美人懷子

不乳來召淳于意意往飲以葇若藥一撮以  
酒飲之旋乳意復診其脉躁躁者有餘病卽  
飲以消石一劑出血豆比五六枚而安此去  
蓄血之驗也 炮灸論治頭痛欲死用消石  
末吹鼻中卽愈 聖惠方治赤眼腫痛用消  
石末臨臥時以銅筋點黍米大入目眥至旦  
以鹽水洗去之

玄明粉味辛甘性冷無毒治心熱煩躁并五藏



宿滯癥結明目退膈上虛熱消腫毒此卽朴硝  
煉成者

疏○玄明粉卽芒硝投滾湯沸化夜置冰霜  
之下結起在水面上者用白菜蕪切片煮汁  
投硝以結起多次者爲上其色瑩白其味辛  
鹹沉而降陰也入手少陰足厥陰陽明經其  
治邪熱在心煩躁者經曰熱淫於內治以鹹  
寒佐之以苦并主五臟宿滯癥結者卽燥糞  
結痰瘀血宿食之謂辛能散結鹹能軟堅兼  
能潤下苦能下洩故主之也目爲血熱所侵  
必赤腫作痛異常硝性峻利加以苦辛鹹寒  
之極故能散熱結逐熱血目病旣去必自明  
矣退膈上虛熱者當作實熱邪解心涼故熱  
退也消腫毒者卽軟堅散結之功也

主治參互

集簡方熱厥氣痛玄明粉三錢熱童便調下



傷寒蘊要傷寒發狂玄明粉二錢朱砂一錢末之冷水服 聖濟總錄鼻血不止玄明粉二錢水服

簡誤

硝者消也五金八石其堅莫比惟硝能銷之苟非大辛至鹹極苦最烈之味其能消化之乎消石朴硝一經澄煉便名芒硝馬牙硝風化硝甜硝若經煅過卽名玄明粉究其功用無堅不磨無結不散無熱不蕩無積不推可謂直往無前物無畱礙之性也別錄謂煉餌服之輕身神仙失其本矣故仲景於諸承氣湯用之非邪結下焦堅實不可按者不用恐其誤伐下焦真陰故也病不由於邪熱深固閉結難通斷不可輕投至於血涸津枯以致太腸燥結陰虛精乏以致太熱骨蒸火炎於上以致頭痛目昏口渴耳聾咽痛吐血衄血



咳嗽痰壅虛極類實等證切戒勿施庶免虛  
虛之咎而無悔不可追之大錯也至如唐玄  
宗所召道士劉玄真謂服玄明粉遂無病長  
生中所載有益精壯氣助陽補陰不拘丈夫  
婦人幼稚襁褓不問四時冷熱俱治之說迺  
是荒唐不經之語不識本草何緣載入豈歷  
代董脩儒臣本不知醫但廣異聞未暇覈實  
而誤收之耶正所謂盡信書則不如無書也

滑石味甘寒大寒無毒主身熱洩瀉女子乳難  
癃閉利小便蕩胃中積聚寒熱益精氣通九竅  
六府津液去留結止渴令人利中久服輕身耐  
饑長年石韋為之使惡曾青

疏○滑石石中之得冲氣者也故味甘淡氣  
寒而無毒入足太陽膀胱經亦兼入足陽明  
手少陰太陽陽明經用質之藥也滑以利諸  
竅通壅滯下垢膩甘以和胃氣寒以散積熱



甘寒滑利以合其用是為祛暑散熱利水除溼消積滯利下竅之要藥本經用以主身熱洩瀉女子乳難蕩胃中積聚寒熱者解足陽明胃家之熱也利小便癰閉者通膀胱利陰竅也其曰益精氣久服輕身耐饑長年此則必無是理矣別錄通九竅津液去留結止渴令人利中者溼熱解則胃氣和而津液自生下竅通則諸壅自洩也丹溪用以燥溼分水道實大腸化食毒行積滯逐瘀血解燥渴補脾胃降心火偏主石淋皆此意耳

主治參互

和甘草為益元散又名天水散六一散太白散解中暑傷寒疫癘并汗後遺熱勞復諸疾兼解兩感傷寒白藥酒食邪熱毒煩滿短氣腹脹悶痛淋瀝澀痛療身熱嘔吐洩瀉腸澼下痢赤白除煩熱胸中積聚寒熱止消渴蓄



水婦人催生下乳治吹乳乳癰牙瘡齒疳此藥大養脾胃之氣通九竅六腑去留結通經脉消水穀安魂定魄乃神驗之仙藥也劉河間傷寒直格本方白滑石水飛過六兩粉甘草一兩爲末每服三錢蜜少許溫水調下實熱則用新汲水下解利則葱豉湯下通乳用猪肉麩湯調下催生用香油漿水調下凡難產或死胎不下皆由風熱燥澀結滯緊歛不能舒緩故也此藥力至則結滯頓開而產矣如用以治痢照雷公炮製用牡丹皮同煮過加丹砂水飛細末每兩一錢名辰砂六一散治心經伏暑下痢純血煩躁口渴神昏不爽聖惠方治膈上煩熱多渴利九竅滑石二兩搗水三大盞煎二盞去滓入粳米煮粥食

千金方治女勞黃疸日晡發熱惡寒少腹急大便溏黑額黑滑石石膏等分研末大麥



汁服方寸七日三小便大利愈腹滿者難治  
 聖惠方治乳石發動煩熱渴滑石粉半  
 兩水一盞絞白汁頓服 廣利方氣壅關格  
 不通小便淋結臍下妨悶兼痛滑石粉水調  
 服一兩 楊氏產乳小便不通滑石末一升  
 車前汁和塗臍之四畔方四寸乾即易之冬  
 月水和 聖惠方治婦人轉胞因過忍小便  
 而致滑石末葱湯服二錢 普濟方伏暑水

白龍丸

泄白龍丸滑石火煅過一兩硫黃四錢為末  
 麩糊丸菜豆大每用淡薑湯隨大小服 又  
 方治伏暑或吐或瀉或瘧小便赤煩渴玉液  
 散用桂府滑石燒四兩藿香一錢丁香一錢  
 為末米湯服二錢亦治霍亂 王氏痘癩方  
 治痘瘡狂亂循衣摸床大渴引飲用益元散  
 一兩加朱砂飛過二錢冰片三分麝香一分  
 用燈心湯調二三錢服 普濟方治風毒熱



瘡遍身出黃水桂府滑石末傅之次日愈先  
以虎杖豌豆甘草等分煎湯洗後乃搽集  
簡方治脚指縫爛滑石一兩石膏煨半兩枯  
礬少許研摻之夏子益奇疾方載白礬石  
條內

簡誤

滑石本利竅去溼消暑除熱逐積下水之藥  
若病人因陰精不足內熱以致小便短少赤  
澀或不利煩渴身熱由於陰虛火熾水涸者  
皆禁用脾腎俱虛者雖作泄勿服

空青味甘酸寒大寒無毒主青盲耳聾明目利  
九竅通血脉養精神益肝氣療目赤痛去膚翳  
止淚出利水道下乳汁通關節破堅積久服輕  
身延年不老令人不忘志高神仙能化銅鐵鉛  
錫作金生益州山谷及越嶲山有銅處銅精熏  
則生空青其腹中空三月中旬採亦無時



疏○空青感銅之精氣而結其味甘酸其氣  
大寒無毒可知已色青法木故入肝而主目  
盲目者肝之竅瞳子神光屬腎肝腎虛則內  
熱怒則火起於肝故生內外障翳此目病所  
由成也甘寒能除積熱兼之以酸則火自斂  
而降矣熱退則障自消目自明耳者腎之竅  
水涸火炎故耳聾腎家熱解則火息水生而  
聽復聰矣九竅不利無非火壅肝家有火則  
血熱氣逆故血脉不通涼肝除熱則精氣自  
益陰足火清則竅自利而血脉自通精神自  
長矣目赤痛膚翳淚出皆肝氣不足之候益  
肝氣則諸證自除矣其曰利水道下乳汁通  
關節破堅積者皆以熱除則氣血和平陰氣  
自復五臟清寧則諸證自解聖藥神功於斯  
顯矣

主治參互



空青得真珠貝子珊瑚石決明點目中內外障翳有神 千金方眼目眈眈不明空青少許漬露一宿點 聖濟總錄膚翳昏暗空青二錢麩仁去皮一兩片腦三錢細研日點明目去翳障 上珍之藥一時難構明目外無別用故不著簡誤

紫石英味甘辛溫無毒主心腹欬逆邪氣補不足女子風寒在子宮絕孕十年無子療上氣心腹痛寒熱邪氣結氣補心氣不足定驚悸安魂魄填下焦止消渴除胃中久寒散癰腫令人悅澤久服溫中輕身延年

疏○紫石英稟土中之陽氣以生本經味甘氣溫無毒別錄加辛雷公言大溫獨李當之言大寒者是昧其性矣味厚於氣陽中之陰降也入手少陰手厥陰足厥陰經少陰主心屬陽而本熱虛則陽氣衰而寒邪得以乘之



或爲上氣欬逆或爲氣結寒熱心腹痛此藥  
溫能除寒甘能補中中氣足心得補諸證無  
不瘳矣驚悸屬心虛魂魄不安亦由心君怯  
弱無以鎮壓諸經茲得鎮墜之力而心君有  
以鎮攝卽重以去怯之義也其主女子風寒  
在子宮絕孕無子者蓋女子繫胎於腎及心  
胞絡皆陰臟也虛則風寒乘之而不孕非得  
溫暖之氣則無以祛風寒而資化育之妙此  
藥填下焦走腎及心包絡辛溫能散風寒邪  
氣故爲女人煖子宮之要藥補中氣益心肝  
通血脉鎮墜虛火使之歸元故又能止消渴  
散癰腫令人悅澤及久服輕身延年也凡入  
丸散用火煨醋淬七次碾末水飛過曬乾入  
藥

主治參互

同白薇艾葉白膠當歸山茱萸川芎香附治



女人子宮虛寒絕孕無子 張文仲備急方  
虛勞驚悸補虛止驚令人能食紫石英五兩  
打如豆大水淘一遍以水一斗煮取三升細  
細服 仲景金匱方治風熱瘕瘕及驚癇風  
引湯紫石英白石英寒水石石膏乾薑大黃  
龍齒牡蠣甘草滑石等分咬咀水一升煎去  
三分食後溫呷無不效者

簡誤

紫石英其性鎮而重其氣煖而補故心神不  
安肝血不足及女子血海虛寒不孕者誠爲  
要藥然而止可暫用不宜久服凡係石類皆  
然不獨石英一物也婦人絕孕由於陰虛火  
旺不能攝受精氣者忌用

赤石脂味甘酸辛大溫無毒主養心氣明目益  
精療腹痛洩瀉下痢赤白小便利及癰疽瘡痔  
女子崩中漏下產難胞衣不出久服補髓好顏



色益智不饑輕身延年白石脂功用大畧相同

條今用惟赤白二者餘皆不用

疏○赤石脂稟土金之氣而色赤則象火故其味甘酸辛氣大溫無毒氣薄味厚降而能收陽中陰也入手陽明大腸兼入手足少陰經經曰澀可去脫大小腸下後虛脫非澀劑無以固之故主腹痛腸澼及小便利女子崩中漏下也赤者南方之色離火之象而甘溫

則又有入血益血之功故主養心氣及益精補髓好顏色也血足則目自明心氣收攝則得所養而下交於腎故有如上功能也癰疽因榮氣不從所生瘡痔因腸胃溼熱所致甘溫能通暢血脉下降能滌除溼熱故主之也其主難產胞衣不出者以其體重下降而酸辛能化惡血惡血化則胞胎無阻滯之患矣東垣所謂胞衣不出澀劑可以下之此之謂



也不饑輕身延年乃方士煉餌之法耳凡洩利腸澼久則下焦虛脫無以閉藏其他固澀之藥性多輕浮不能達下惟石脂體重而澀直入下焦陰分故爲久利洩澼之要藥

主治參互

和劑局方冷痢腹痛下白凍如魚腦者桃花丸主之赤石脂煨研乾薑炮等分爲末蒸餅爲丸量大小服日三服 仲景方傷寒下利

便膿血不止桃花湯主之赤石脂一斤一半全用一半末用乾薑一兩粳米半升水七升煮米熟去滓每服七合納末方寸匕日三服愈乃止 千金翼方痰飲吐水無時節者其原因冷飲過度遂令脾胃氣弱不能消化飲食飲食入胃皆變成冷水及吐不停赤石脂散主之赤石脂一斤搗篩服方寸匕酒飲自任稍加至三七服盡一斤則終身不吐痰水



又不下利補五臟令人肥健有人患痰飲服諸藥不效用此遂愈病人虛者宜之

簡誤

火熱暴注者不宜用滯下全是溼熱於法當忌自非的受寒邪下利白積者不宜用崩中法當補陰清熱不可全仗收澀滯下本屬溼熱積滯法當祛暑除積止澀之藥定非所宜慎之慎之

無名異味甘平無毒主金瘡折傷內損止痛生肌肉

疏○無名異稟地中陰水之氣以生本經味甘氣平無毒蘇頌鹹寒鹹能入血甘能補血寒能除熱故主金瘡折傷內損及止痛生肌肉也蘇頌醋摩傅腫毒癰疽者亦取其活血涼血之功耳

主治參互



集驗方打傷腫痛無名異為末酒服趕下四肢  
瘀血皆散矣 多能鄙事損傷接骨無名  
異甜瓜子各一兩乳香沒藥各一錢為末每  
服五錢熱酒調服小兒三錢服畢以黃米粥  
塗紙上摻左顧牡蠣末裹之竹篦夾住 談  
野翁試效方臨杖預服無名異末臨時溫酒  
服三五錢則杖不甚痛亦不甚傷 除折傷  
腫毒外無他用故不著簡誤

綠礬涼無毒治喉痺蚰牙口瘡及惡瘡疥癬  
鯽魚燒灰和服療腸風瀉血

一名皂礬煨赤醋  
碎為礬紅又名青

礬

疏○綠礬氣味所稟與白礬同其酸涌澀收  
燥溼解毒化涎之功亦與白礬相似而力差  
緩本經主喉痺者酸涌化涎之功也蚰牙口  
瘡惡瘡疥癬者燥溼除熱解毒之功也腸風  
瀉血者消散溼熱之後復有收澀之功也然



消積

而諸治之外又善消積滯凡腹中堅肉積諸藥不能化者以礬紅同健脾消食藥為丸投之輒消

主治參互

得紅麴山查肉豆蔻消肉積加麥芽橘皮草果檳榔三稜蓬茂消一切肉積及米麩食堅積 脾病黃腫用綠礬四兩煨成赤珠子當歸四兩酒浸七日焙百草霜三兩為末以浸

消一切

積丸

黃腫

病

藥酒打糊丸梧子大每服五丸至七丸溫水下 一月後黃去立效 楊真人濟急方酒黃水腫黃腫積痛青礬半斤醋一大碗和勻丸盆內煨乾為度平胃散烏藥順氣散各半兩為末醋煮糊丸梧子大薑湯下二三十丸 救急方食勞黃病身日俱黃青礬鍋內安炭煨赤米醋拌為末棗肉和丸梧子大每服二三十丸食後薑湯下 聖惠方腹中食積綠



礬二兩研米醋一大盃瓷器煎之柳條攪成膏入赤脚烏一兩研丸菘豆大每空心溫酒下五丸  
談野翁試效方走馬疔瘡綠礬煨紅以醋拌勻如此三次為末入麝香少許溫漿水漱淨摻之應加龍腦雄黃蓬砂芒硝

簡誤

綠礬礬紅雖能消肉食堅積然能令人作瀉胃弱人不宜多服此者終身忌食蕎麥犯

之立斃

鐵鏽主惡瘡疥癬和油塗之蜘蛛蟲等咬和蒜

磨傅之

鐵衣名

疏○鐵鏽得金氣之英華其味應辛苦氣應寒惡瘡疥癬溼熱所生蜘蛛蟲咬毒氣傷血辛苦能除溼熱寒能解熱毒氣故主之也又秘法取露天入土者研極細同蟾酥腦麝以金鍼刺入疔瘡中令至根然後以藥塞入能



拔疔根輒效蓋疔腫未有不因肝經風熱所致此藥屬金善能平木故有如是之功普濟方疔腫初起多年土內鏽釘火煨醋淬刮下鏽末研細每用少許人乳和挑破傅之

神農本草經疏卷之三

神農本草經疏卷之四

玉石部中品

總八十七種今疏其要者一十八種

雄黃 石硫黃 食鹽

水銀 石膏 金屑

靈砂 水銀粉 磁石

凝水石 陽起石 蜜陀僧

鐵落 珊瑚 瑪瑙



太陰玄精 土蜂窩上細土

胡燕窩內土

雄黃味苦甘平寒大溫有毒主寒熱鼠瘻惡瘡  
疽痔死肌療疥蟲蠹瘡目痛鼻中息肉及絕筋  
破骨百節中大風積聚痺氣中惡腹痛鬼疰殺  
精物惡鬼邪氣百蟲毒勝五兵殺諸蛇虺毒解  
藜蘆毒悅澤人面鍊食之輕身神仙餌服之皆  
飛入人腦中勝鬼神延年益壽保中不肌得銅

可作金

疏○雄黃稟火金之性得正陽之氣以生本  
經味苦平氣寒有毒別錄加甘大溫甄權言  
辛大毒察其功用應是辛苦溫之藥而甘寒  
則非也氣味俱厚升也陽也入足陽明經其  
主殺精物惡鬼邪氣及中惡腹痛鬼疰者蓋  
以陽明虛則邪惡易侵陰氣勝則精鬼易憑  
得陽氣之正者能破幽暗所以殺一切鬼邪



勝五兵也寒熱鼠瘦惡瘡疽痔死肌疥蟲蠹  
瘡諸證皆溼熱留滯肌肉所致久則浸淫而  
生蟲此藥苦辛能燥溼殺蟲故爲瘡家要藥  
其主鼻中息肉者肺氣結也癖氣者大腸積  
滯也筋骨斷絕者氣血不續也辛能散結滯  
溫能通行氣血辛溫相合而殺蟲故能搜剔  
百節中大風積聚也虺蛇陰物藜蘆陰草雄  
黃稟純陽之氣所以善殺百蟲蛇虺毒及解

藜蘆毒也別錄復有目痛及悅澤人面之語  
悉非正治鍊餌之法出自仙經以銅爲金亦  
黃白術中事耳

主治參互

同紅白藥子白及白欽乳香沒藥米片傳一  
切腫毒癰疽 研細末入猪胆內套指頭上  
治天蛇疔毒發於中指 同金頭蜈蚣牛角  
腮猪懸蹄狷皮象牙末黃蠟白礬治通腸漏



同漆葉苦參刺蒺藜白芷荆芥天麻鼈凡蝨  
胡麻半枝蓮豨蠃百部天門冬治大麻風眉  
毛脫落 治暑毒瘡痢百法不效用雄黃研  
細水飛九次竹筒盛蒸七次再研蒸餅和丸  
梧子大每服甘草湯下七丸日三服其辭云  
暑毒在脾溼氣連脚不泄則痢不痢則瘡獨  
煉雄黃蒸餅和藥別作治療醫家大錯此管  
人夢中所得之方今試之輒效 聖惠方傷

寒狐惑蟲食下部痛痒不止雄黃半兩燒於  
瓶中熏其下部 肘後方五尸疰病發則變  
痛無常昏恍沉重纏結臟腑上衝心脇卽身  
中尸鬼接引爲害也雄黃大蒜各一兩杵丸  
彈子大每熱酒服一丸 夏氏奇疾方筋肉  
蟲有蟲如蟹走於皮下作聲如小兒啼爲筋  
肉之化雄黃雷丸各一兩爲末摻猪肉上炙  
熟喫盡自安 趙香玲 積德堂方廣東惡瘡雄黃一



錢半杏仁三十粒去皮輕粉一錢為末洗淨以雄猪胆汁調上二三日即愈百發百中天下第一方也出武定侯府內入龍腦少許尤良

簡誤

雄黃殺蛇蟲咬毒及傳疥癬惡瘡疔腫辟鬼魅邪氣在所必用然而性熱有毒外用易見其所長內服難免其無害凡在服餌中病乃已毋盡劑也

石硫黃味酸溫大熱有毒主婦人陰蝕疽痔惡血堅筋骨除頭禿療心腹積聚邪氣冷癖在脇欬逆上氣脚冷疼弱無力及鼻衄惡瘡下部蠱瘡止血殺疥蟲能乾汞中其毒者黑鉛煎湯解之或食冷猪血

疏○石硫黃稟火氣以生本經味酸氣溫有毒別錄大熱黃帝雷公鹹有毒氣味俱厚純陽之物也入手厥陰經經曰寒淫於內治以



溫熱冷癖在脇欬逆上氣寒邪在中也非溫劑無以除之又曰鞭則氣堅鹹以軟之心腹積聚邪氣堅積在中也非鹹劑無以軟之命門火衰則為脚冷疼弱無力下焦溼甚則為陰蝕疽痔蠱瘡酸溫能補命門不足大熱能除下焦溼氣故主之也其主頭禿惡瘡疥蟲者悉取其除溼殺蟲之功耳本經又主堅筋骨及別錄療鼻衄止血者皆非其所宜夫熱甚則骨消筋緩火載血上則錯經妄行豈有大熱之物反能療是證哉無是理也

主治參互

入雞子同艾葉煮食治婦人白帶因於虛寒者 聖惠方諸瘡弩肉如蛇出數寸硫黃末一兩肉上薄之即縮 救急良方疥瘡有蟲硫黃末以雞子煎香油調搽極效

簡誤



硫黃古方未有服餌者本經所用止於治瘡  
蝕攻積聚冷氣脚弱等而近世遂爲常服丸  
散如來復丹半硫丸金液丹黑龍丹及諸方  
書所載者不可縷指稱其功用亦未能殫述  
然而人身之中陽常有餘陰常不足病寒者  
少病熱者多苟非真病虛寒胡可服此大熱  
毒藥假令果係虛寒證法當補氣以回陽亦  
何須藉此毒石哉世人徒知其取效良捷而  
不知其爲害之酷烈也戒之戒之

食鹽味鹹溫無毒主殺鬼蠱邪疰毒氣下部羸  
瘡傷寒寒熱吐胸中痰癖止心腹卒痛堅肌骨  
多食傷肺喜欬

疏○鹽稟水氣以生洪範潤下作鹹素問水  
生鹹此鹽之根源也本經味鹹別錄鹹溫無  
毒察其本具氣味則是鹹寒而非溫也氣薄  
味厚陰也降也入足少陰亦入手少陰足陽



明手太陰陽明經其主腸胃結熱喘逆胸中  
病及傷寒寒熱者皆熱邪在陽明也經曰熱  
淫於內治以鹹寒正此之謂也五臟苦欲補  
瀉云心欲軟急食鹹以軟之以鹹補之心虛  
則邪熱客之而卒痛鹹寒能除熱補心故主  
心腹卒痛也凡溼熱在下焦則爲蠱瘡留著  
經絡則肌骨軟鹹寒能除溼熱故主之也或  
以爲鹹能軟堅又何以堅肌骨不知肌骨軟  
緩皆溼熱所致經曰熱則骨消筋緩又曰體  
重胛腫肉如泥皆屬於溼如夏月溼熱大盛  
則肉食易於潰散得鹽性之鹹寒乃能堅久  
不腐也鹹味涌泄所以能吐胸中痰癖及鬼  
蠱邪疰毒氣悉皆吐出也多食傷肺喜欬者  
肺主清肅多食則鹹味漬入肺竅故令欬也  
日華子以之助水臟及霍亂心痛金瘡明目  
止風淚邪氣一切蟲傷瘡腫火灼通大小腸



療疝氣諸治悉取其入腎入心走血軟堅除  
熱潤下之功耳

主治參互

炒鹽三錢以炒砂仁五錢爲末泡湯井水澄  
冷灌下治霍亂心腹絞痛有效 一味炒作  
湯治心經火熱作痛 柳柳州纂救三死方  
治霍亂上不得吐下不得瀉氣絕欲死者用  
鹽一大匙熬令黃童子小便一升合和溫服

少頃吐下卽愈也 孫真人方卒中尸遁服

鹽湯取吐效 甄權藥性論中惡心痛鹽如

雞子大青布裹燒赤納酒中頓服當吐惡物

愈 唐瑤經驗方風熱牙痛以槐枝煎濃湯

二盞入鹽一斤煮乾炒研日用揩齒以水洗

目 梅師方蜈蚣咬人嚼鹽塗之或鹽湯洗

之妙 經驗方蚯蚓咬毒形如大風眉鬚皆

落惟濃煎鹽湯浸身數遍卽愈浙西將軍張



韶病此每夕蚯蚓鳴於體一僧用此方而安  
蚯蚓畏鹽故也

簡誤

內經曰鹹走血血病無多食鹹多食則脉凝  
泣而色變凡血病及喘嗽水腫消渴法所大  
忌以其或傷肺引痰或泣血脉或助水邪或  
走精液故也

水銀味辛寒有毒主疥癩痂瘍白禿殺皮膚中

蟲墮胎除熱以傅男子陰陰消無氣殺金銀銅

錫毒鎔化還復為丹久服神仙不死一名汞得鎔

則凝得硫則結併棗肉人唾研則散別法煨為  
膩粉粉霜得紫河車則伏得川椒則收

疏○水銀從石中迸出為石汞從丹砂中出

者為硃裏汞即丹砂中液也稟至陰之氣而

有汞故其味辛其氣寒而有毒善能殺蟲其

性下走無停歇故本經以之主疥癩痂瘍白

禿殺皮膚中蟲及墮胎除熱也至陰之精能



消陽氣故不利男子陰也神仙不死之說必  
得鉛華相合乃能收攝真氣凝結爲丹卽道  
家所謂太陽流珠常欲去人卒得金華轉而  
相因之旨也伏鍊五金爲泥以其性能殺金  
銀銅錫毒也鎔化還復爲丹亦出仙家烹鍊  
耳

主治參互

得礬石丹砂芒硝雄黃黑鉛入陽城罐內如

法昇煉名紅粉霜能止痛生肌少加冰片研  
勻擦廣瘡有效製法具礬輕粉 同大風子  
蛇床子樟腦輕粉枯礬雄黃胡桃油治疥癬  
蟲瘡 肘後方一切惡瘡水銀黃連胡粉熬  
黃各一兩研勻傳之乾則以唾調

簡誤

陳藏器曰水銀入耳能食人腦至盡入肉令  
百節攣縮倒陰絕陽人患瘡疥多以水銀塗



之性滑重直入肉宜謹之頭瘡切不可用恐入經絡必緩筋骨寇宗奭云水銀入藥雖各有法極須審謹有毒故也歷舉學士大夫惑於方士之說服煨鍊水銀而暴卒者不可勝數婦人誤服多致絕孕其為毒害昭昭矣惟宜外敷不宜內服入口為厲可不戒哉

石膏味辛甘微寒大寒無毒主中風寒熱心下逆氣驚喘口乾舌焦不能息腹中堅痛除邪鬼

瘡乳金瘡除時氣頭痛身熱三焦大熱皮膚熱

腸胃中膈氣解肌發汗止消渴煩逆腹脹暴氣

喘息咽熱亦可作浴湯

堅白明瑩者良浙人呼為寒水石者真

疏○石膏稟金水之正得天地至清至寒之

氣故其味辛甘其氣大寒而無毒陰中之陽

可升可降入足陽明手太陰少陽經氣分辛

能解肌甘能緩熱大寒而兼辛甘則能除大

熱故本經主中風寒熱熱則生風故也邪火



上衝則心下有逆氣及驚喘陽明之邪熱甚則口乾舌焦不能息邪熱結於腹中則腹中堅痛邪熱不散則神昏譫語同乎邪鬼肌解熱散汗出則諸證自退矣惟產乳金瘡非其用也別錄除時氣頭痛身熱三焦大熱皮膚熱腸胃中膈氣解肌發汗止消渴煩逆腹脹暴氣喘息咽熱者以諸病皆由足陽明胃經邪熱熾盛所致惟喘息咽熱略兼手太陰痛

此藥能散陽明之邪熱降手太陰之痰熱故悉主之也甄權亦用以治傷寒頭痛如裂壯熱如火日華子用以治天行熱狂頭風旋指齒東垣用以除胃熱肺熱散陽邪緩脾益氣者邪熱去則脾得緩而元氣回也潔古又謂止陽明經頭痛發熱惡寒日晡潮熱大渴引飲中暑及牙痛者無非邪在陽明經所生病也理陽明則茂不濟矣足陽明主肌肉手太



陰主皮毛故又爲發斑發癩之要品起死回生功同金液若用之甚少則難責其功世醫罔解茲特表而著之

主治參互

仲景白虎湯專解陽明邪熱其證頭疼壯熱口渴煩躁鼻乾目眴眴不得眠畏人聲木聲畏火若勞役人病此元氣先虛者可加人參名人參白虎湯發癩陽毒盛者白虎湯加竹

葉麥門冬知母以石膏爲君自一兩至四兩麥門冬亦如之知母自七錢至二兩竹葉自百片至四百片粳米自一大撮至四大撮甚則更加黃連黃蘗黃芩名三黃石膏湯自一劑至四劑婦人妊娠病此者亦同傷寒汗後煩熱不解竹葉石膏湯主之小兒痧癩發熱口渴唇焦咳嗽多嚏或多痰或作泄竹葉石膏湯加赤檉木枝兩許貝母栝樓根各



二三錢主之發瘧亦同甚者加三黃 瘧疾  
 頭痛壯熱多汗發渴亦用竹葉石膏湯二三  
 劑主之虛者加人參後隨證施治 中暑用  
 白虎湯虛者加人參 太陽中暍亦用竹葉  
 石膏湯 胃家實熱或嘈雜消渴善飢齒痛  
 皆須竹葉石膏湯主之

簡誤

石膏本解實熱祛暑氣散邪熱止渴除煩之  
 要藥溫熱二病多兼陽明若頭痛遍身骨痛  
 而不渴不引飲者邪在太陽也未傳陽明不  
 當用七八日來邪已結裏有燥糞往來寒熱  
 宜下者勿用暑氣兼溼作泄脾胃弱甚者勿  
 用瘧邪不在陽明則不渴亦不宜用產後寒  
 熱由於血虛或惡露未盡骨蒸勞熱由於陰  
 精不足而不由於外感金瘡下乳更非其職  
 宜詳察之竝勿誤用



金屑味辛平有毒主鎮精神堅骨髓通利五臟

除邪毒氣服之神仙寇宗奭曰不曰金屑而更屑字者是已經磨屑可用之

義必須烹鍊銀屑為箔方可入藥蘇頌曰金屑古方不見用惟作金箔入藥甚便又古方有金

石凌紅雪紫雪輩皆取金銀煮汁此通用經煉者假其氣爾生金有毒能殺人且難解有中其

毒者惟鷓鴣肉可解之性惡錫畏水銀

疏○金屑稟西方剛利之性善能制木體重

而降亦能鎮心心氣怯則驚邪易入精神不

安五臟皆為之病肝經風熱則為驚癇失志

魂魄飛揚肝屬木而長金與心為子母之臟

故其病同一源治亦同法本經主鎮驚通利

五臟邪氣及甄權療小兒驚傷五臟風癇失

志鎮心安魂魄者亦兼實則瀉其子之義也

本經又主堅骨髓者以肝心平風熱退則精

血生骨髓自堅矣服之神仙乃出自仙經非

醫方所述也

主治參互



入至寶丹治中風不語氣絕中惡蠱毒尸疰  
 難產血暈等證 入牛黃清心丸治諸風緩  
 縱不隨語言蹇澁恍惚怔忡痰涎壅塞驚恐  
 怕怖或喜怒無時癲狂昏亂 入紫雪治內  
 外煩熱口舌生瘡狂呼叫走瘴疫毒癘卒死  
 溫瘧五尸五疰蠱毒卒黃小兒驚癇百病紅  
 雪治療略同 金箔鎮心丸治小兒風壅痰  
 熱驚悸譫妄心神不寧 磨細屑挑開疔瘡

頭上沒入能拔疔根作鍼鍼疔瘡納藥拔疔

簡誤

太清法云金稟中宮陰巳之氣性本剛服之  
 傷肌損骨予見今之以難求死者服金一二  
 分則心腹剗痛腸胃如裂而斃其為損傷肌  
 骨槩可見矣惟作箔入藥可為鎮心安神之  
 用如或止因心氣虛以致神魂不安竝無驚  
 邪外入者當以補心安神為急而非金箔所



能定矣

靈砂味甘溫無毒主五藏百病養神安魂魄益氣明目通血脉止煩滿益精神殺精魅惡鬼氣久服通神明不老輕身神仙令人心靈一名二氣砂

疏○靈砂硫汞制而成乃水火既濟二氣交合奪造化之功竊陰陽之妙可以變化五行并降氣血爲除邪養正扶危救急之靈丹也

故能主五臟百病益精神安魂魄及益氣養神也其主明目通血脉止煩滿殺精魅惡鬼氣者特其餘事耳得陰陽之妙故能令人心靈心靈則神明自通不老輕身神仙所自來矣又能主上盛下虛痰涎壅盛頭旋吐逆霍亂反胃心腹冷痛諸證更爲鎮墜之神丹也  
修治用水銀一兩硫黃六銖細研炒作青砂頭後入水火既濟爐抽之如束鍼紋者成



就也又按胡演丹藥秘訣云升靈砂法用新  
鍋安道遙爐上蜜揩鍋底文火下燒入硫黃  
二兩鎔化投水銀半斤以鐵匙急攪作青砂  
頭如有焰起噴醋解之待永不見星取出細  
研盛入水火鼎內鹽泥固濟下以自然火升  
之乾水十二盞爲度取出束鍼紋者成矣

主治參互

錢氏小兒方霍亂吐逆不問虛實冷熱二氣

散一名青金丹用水銀硫黃等分研不見星  
每服一字生薑湯調下 直指方冷氣心痛  
靈砂三分五靈脂一分爲末稀糊丸麻子大  
每服二十丸食前石菖蒲生薑湯下 又方  
九竅出血因暴驚而得其脉虛者靈砂丹三  
十粒人參湯下三服愈此證不可認作血得  
熱則妄行而用涼藥誤矣何者驚則氣浮神  
魂發越陽氣暴壅故也得鎮墜則神魂復安



而血自循經矣 和劑局方有養正丹又名  
交泰丹用黑鉛硃砂水銀硫黃炒成即靈砂  
意也其用亦與靈砂略同

簡誤

靈砂雖稱水火既濟陰陽配合然而硫汞有  
毒性亦下墜止可藉其墜陽交陰却病于一  
時安能資其養神益氣通靈于平日哉凡胃  
虛嘔吐傷暑霍亂肺熱生痰病屬于虛非關

驟發者咸在所忌

水銀粉味辛冷無毒主通大腸傳小兒疳痺瘰  
癧殺瘡疥癬蟲及鼻上酒皸風瘡瘙痒又名汞

粉輕粉膩粉

畏磁石石黃忌一切血本出於丹砂故也土茯苓黑鉛鐵漿可制其

毒

疏○水銀粉升鍊水銀而成其味本辛氣冷  
無毒療體與水銀相似第其性稍輕浮爾大  
腸熱燥則不通小兒疳痺因多食甘肥腸胃



結滯所致辛涼總除腸胃積滯熱結故主之也其主瘰癧瘡疥癬蟲及鼻上酒皰風瘡瘙癢者皆從外治無非取其除熱殺蟲之功耳升煉輕粉法用水銀一兩白礬二兩食鹽一兩同研不見星鋪於鐵器內以小烏盆覆之鹽泥封固盆口以炭火打三炷香取開則粉升於盆上矣

土治參互

活幼口議小兒吮乳不止服此立效膩粉一錢鹽豉七粒去皮研勻丸麻子大每服三丸藿香湯下 經驗方小兒吃泥及膿肚用膩粉一分砂糖和丸麻子大空心米飲下一丸良久泄出泥土瘡 聖惠方大小便閉脹悶欲死二三日則殺人膩粉一錢生麻油一合相和空心服 萬表積善堂方下疳陰蝕瘡輕粉末乾摻之卽結靨而愈 永類鈴方臙



瘡不合葱汁調輕粉傅之 又秘法升丹靈藥方治癰疽惡瘡楊梅諸瘡拔毒長肉神驗水銀一兩黑鉛七錢硃砂雄黃各三錢白礬火硝各二兩半其法先用鉛化開投水銀凝成餅入硃砂雄黃研勻然後將礬礬化投前四味末入內離火急攪令勻用陽城礬盛之鐵盞蓋口上架鐵梁鍊線紮緊鹽泥固濟神仙爐內文武火升鍊盞中時時以水擦之火漸加以三分爲率每焚官香一炷則加分如是鍊三炷官香爲度候冷取開於盞底刮取研如飛麵甘草湯飛過三次入龍腦香少許點廣瘡上數數以指蘸藥按之三日自脫神方也

簡誤

水銀粉下膈涎消積滯并小兒涎潮瘕瘕藥多用然而其性有毒走而不守若服之過劑



或不得當則毒氣熏蒸竄入經絡筋骨莫之  
能出痰涎既去血液隨亡筋失所養營衛不  
從變為筋攣骨痛或結腫塊漏瘡或手足鞍  
裂頑痺等證遂成痼疾貽害無窮蓋此物本  
成於汞則汞之毒尚存又得火煨則火之毒  
氣未出本經言其無毒誤也凡閉結由於虛  
血不能潤澤小兒疳病脾胃兩虛小兒慢驚  
痰涎壅上楊梅結毒發於氣虛久病之人咸

不宜服宗奭有云病屬於驚尤須審謹蓋驚  
為心氣不足不可下下之裏虛驚氣入心不  
可治其人本虛便須禁此慎之至也

磁石味辛鹹寒無毒主周痺風溼肢節中痛不  
可持物洗洗酸消除大熱煩滿及耳聾養腎藏  
堅骨氣益精除煩通關節消癰腫鼠瘦頸核喉  
痛小兒驚癇鍊水飲之亦令人有子一名玄石

即吸鍊石入藥須火燒醋淬  
研末水飛或醋煮三日



疏○磁石生於有鐵處得金水之氣以生本  
 經味辛氣寒無毒別錄甄權鹹有小毒大明  
 甘瀼平藏器鹹溫今詳其用應是辛鹹微溫  
 之藥而甘寒非也氣味俱厚沉而降陽中陰  
 也入足少陰兼入足厥陰經其主周痺風溼  
 肢節中痛不可持物洗洗酸者皆風寒溼三  
 氣所致而風氣尤勝也風淫末疾發於四肢  
 故肢節痛不能持物風溼相搏久則從火化  
 而骨節皮膚中洗洗酸也辛能散風寒溫能  
 通關節故主之也鹹為水化能潤下軟堅辛  
 能散毒微溫能通行除熱故主大熱煩滿及  
 消癰腫鼠瘻頸核喉痛者足少陽少陰虛火  
 上攻所致鹹以入腎其性鎮墜而下吸則火  
 歸元而痛自止也夫腎為水臟磁石色黑而  
 法水故能入腎養腎臟腎主骨故能強骨腎  
 藏精故能益精腎開竅於耳故能療耳聾腎



主施泄久秘固而精氣盈益故能令人有子  
小兒驚癇心氣怯痰熱盛也鹹能潤下重可  
去怯是以主之甄權云補男子腎虛風虛身  
強腰中不利加而用之宗奭云養腎氣填精  
髓腎虛耳聾目昏者皆用之

主治參互

自指方耳卒聾閉吸鐵石半錢入病耳內鐵  
砂末入不病耳內自然通透 千金方陽事

神光  
寬大  
漸散

不起磁石五斤研清酒漬二七日每服三合  
日二夜一 倪微德原機啓微集眼昏內障  
神光寬大漸散昏如霧露中行漸睹空花物  
成二體久則光不收及內障磁硃丸真磁石  
火煨醋淬七次二兩硃砂一兩神曲生用三  
兩爲末更以神麩末一兩煮糊加蜜丸梧子  
大每服二十丸空心飯湯下 千金方金瘡  
血出磁石末傅之止痛斷血 諸藥石皆有



毒且不宜久服獨磁石性稟冲和無猛悍之氣更有補腎益精之功故不著簡誤大都漬酒優於丸散石性體重故爾

凝水石味辛甘寒大寒無毒主身熱腹中積聚邪氣皮中如火燒煩滿水飲之除時氣熱盛五臟伏熱胃中熱煩滿止渴水腫小腹痺久服不饑一名寒水石一名白水石色如雲母可析者

是鹽之精也

石膏亦名寒水石與此不同

疏○凝水石生於鹵地稟積陰之氣而成本經味辛氣寒別錄加甘大寒無毒經曰小熱之氣涼以和之大熱之氣寒以取之又曰熱淫於內治以鹹寒大寒微鹹之性故主身熱邪氣皮中如火燒煩滿及時氣熱盛五臟伏熱胃中熱也易飢作渴亦胃中伏火也甘寒除陽明之邪熱故能止渴不飢水腫者淫熱也小便多不利以致水氣上溢於腹而成腹



痺辛鹹走散之性故能除熱利竅消腫也療腹中積聚者亦取其辛散鹹軟之功耳

主治參互

永類方男女轉脬不得小便寒水石二兩滑石一兩葵子一合爲末水一斗煮五升時服一升卽利 經驗方小兒丹毒皮膚熱赤寒水石半兩白土一分爲末米醋調塗之

簡誤

凝水石按本文云鹽之精則與石膏方解石大相懸絕矣因石膏有寒水石之名而王隱君復云寒水石又名方解石以致混淆難辨其功能各不同用者自宜分別生鹵地味辛鹹碎之如朴硝者是凝水石其氣大寒能除有餘邪熱凡陰虛火旺咳嗽吐血多痰潮熱骨蒸并脾胃作泄者不宜服經曰諸腹脹大皆屬於熱者宜之諸溼腫滿屬脾土者忌之



大宜詳審慎勿有誤

陰痿  
不起

陽起石味鹹微溫無毒主崩中漏下破子藏中

血癥瘕結氣寒熱腹痛無子陰痿不起補不足

療男子莖頭寒陰下溼痒去臭汗消水腫久服

不飢令人有子白色瑩明若狼牙者為上用  
火煨酒淬七次研細木飛日乾

疏○陽起石稟純陽之氣以生本經味鹹氣

微溫無毒觀圖經所載齊州陽起山其山常

有煖氣雖盛冬大雪徧境獨此山無少積蓋

石氣熏蒸也其為氣之溫煖當不甚微矣味

鹹而氣溫入右腎命門補助陽氣并除積寒

宿血畱滯下焦之聖藥故能主崩中漏下及

破子臟中血癥瘕結氣寒熱腹痛及男子莖

頭寒陰痿不起陰下溼痒令人有子也真陽

足則五臟之氣充溢邪溼之氣外散故久服

不飢并去臭汗也別錄又主消水腫者蓋指

真火歸元則能煖下焦熏蒸糟粕化精微助



脾土以制水也

主治參互

河破故紙鹿茸膈胝菟絲子狗陰莖肉菘  
容巴戟天治命門虛寒陰痿不起精寒無嗣  
服之能令陽道豐隆使人有子總治男子九  
醜之疾

簡誤

陰虛火

有忌之陽痿屬於失志以致火氣

閉密不得發越而然及崩中漏下由於火盛  
而非虛寒者並不得服

蜜陀僧味鹹辛平有小毒主久痢五痔金瘡面

上癩黥面膏藥用之

舊山南閩中銀銅治處今甚難得但取煎銷銀鋪爐

底用之

疏○蜜陀僧感銀銅之氣而結故其味鹹辛  
氣平有小毒久痢五痔大腸溼熱積滯也辛  
主散結滯鹹主潤下除熱大腸清寧則久痢



五痔自瘳矣體重能消磨堅積味鹹能入血  
涼血故又主金瘡及滅面上癩野也

主治參互

聖惠方鼻皴赤炮蜜陀僧二兩細研人乳調  
夜塗旦洗 活人心鑑夏月汗斑如瘰用蜜  
陀僧八錢雄黃四錢先以薑片擦熱仍以薑  
片醮末擦之次日卽焦 壽域方骨疽出骨  
一名多骨瘡不時出細骨乃母受胎未及一  
月與六親骨肉交合感其精氣故有多骨之  
名以蜜陀僧末桐油調勻攤貼之卽愈

簡誤

蜜陀僧惟治野黯傳面外今人無復用以服  
食者大都可外敷不可內服此藥難得真者  
銷銀爐底乃硝銅之氣所結能爛一切物故  
益不宜輕用

鐵落味辛甘平無毒主風熱惡瘡瘍疽瘡痂疥



氣在皮膚中除胸膈中熱氣食不下止煩去黑  
子可以染皂

疏○鍊落是鍛家燒鐵赤沸砧上煨之如皮  
甲落下者本出於鍊不離金象體重而降故  
素問有生鍊落飲以療病狂怒者云生鍊落  
下氣疾也又狂怒屬肝氣暴升故取金氣以  
制之也其主氣在皮膚中及除胸膈中熱氣  
食不下止煩者皆制本散熱之功也本經又

主風熱惡瘡瘍疽瘡疥者皆肝心火熱所  
致辛平能除二經之火熱故主之也蘇恭以  
之炒熱投酒中飲療賊風瘧大明治驚邪癩  
癩小兒客忤竝煎服之悉此意耳

### 主治參互

鐵稱錘燒紅淬入米泔中百次乘熱熏洗陰  
癬頑瘡皆有效別敷殺蟲涼血藥彌佳

珊瑚味甘平無毒主宿血去目中翳鼻衄末吹



鼻中

疏○珊瑚得水中之陰氣以生味甘氣平性  
主消散故能去目中腎及消宿血止鼻衄也  
主治參互

同貝子真珠瑪瑙琥珀石蟹爲極細末點入  
目中去膚腎 甘平無毒主療亦稀故無簡  
誤

瑪瑙味辛寒無毒主辟惡熨目赤爛

疏○瑪瑙玉之屬也觀陳藏器云研木不熱  
其性寒可知矣寒而帶辛故能辟惡及熨目  
赤爛也同珊瑚輩爲末點目去障腎尤妙  
太陰玄精味鹹溫無毒主除風冷邪氣溼痺益  
精氣婦人痼冷漏下心腹積聚冷氣止頭疼解  
肌其色青白龜背者良

疏○大陰玄精出於鹽鹵之地乃至陰之精  
凝結而成故其形皆六出象老陰之數也本



經味鹹氣溫無毒然詳其所主味應帶辛氣  
應作寒非辛寒則不能除風冷邪氣溼痺及  
止頭疼解肌等證鹹能軟堅故主心腹積聚  
鹹能潤下入腎滋水故主益精氣本經誤認  
爲溫故有婦人痼冷漏下冷氣之治皆非所  
宜也

主治參互

圖經本草正陽丹治傷寒三日頭疼壯熱四  
肢不利太陰玄精石硝石硫黃各二兩蓬

一兩細研入瓶固濟以火半斤於瓶子周一  
寸煖之約近半日候藥青紫色住火待冷取  
出用臘月雪水拌勻入罐子中屋後北陰下  
陰乾又入地理二七日取出研細麩糊丸雞  
頭實大先用熱水浴後以艾湯研下一丸以  
衣蓋汗出爲瘥 入來復丹治緩急諸病但  
有胃氣無不獲安



簡誤

傷寒陰證不宜服鹹能走血用以引經入腎則可多則反瀉腎傷血矣血病無多食鹹戒之

土蜂窩上細土

本經無氣味云主腫毒醋和爲泥傅之亦主蜘蛛咬必是甘平無毒之物甘爲土化故能解諸毒也

燕窩內土無毒主風瘙癢癰及惡刺瘡浸淫  
身至心者死竝水和敷之

疏○胡燕卽玄鳥春分後至窠取四刀溼土爲之其氣味必甘寒故藏器以之療諸瘡瘍蓋諸痛痒瘡瘍皆屬心火而甘寒最能無火毒土性能化一切毒故也

主治參互

入用燕膏貼瘰癧有效回燕者朝北燕窠土



神農本草經疏卷之五

玉石部下品

總九十三種今疏其要者二十三種

伏龍肝

石灰

百草霜附

砒霜

錫

硃砂

鉛丹

鉛

粉錫

東壁土

赤銅屑

銅青

井底泥

代赭

戎鹽

地漿



自然銅

梁上塵

礞石

麥飯石

花乳石

蓬砂

鉛霜

古文錢

伏龍肝味辛微溫主婦人崩中吐血止欬逆上

血消癰腫毒氣

此竈中對釜月下黃土以年久如赤色石中黃者佳研細水飛

用

疏○伏龍肝得火土之氣而成本經味辛氣

微溫無毒甄權言鹹其質本土味應有甘以

竈有神故古方多以之治顛狂寐魘及卒中

邪惡等證本經主婦人崩中吐血止欬逆上

血者蓋以失血過多中氣必損甘能補中微

溫能調和血脉故土之也消癰腫毒氣者辛

散鹹軟之功也日華子主催生下胞及小兒

夜啼者取其土中有神而性本冲和復能鎮

重下墜也

主治參互



千金方卒中惡氣伏龍肝末一雞子大水服  
取吐 救急方產後血氣攻心痛惡露不下  
竈中心土研末酒服二錢瀉出惡物立效  
傷寒類要妊娠熱病伏龍肝末雞子許大水  
調服之仍以水和塗臍上方寸乾則再上  
外臺秘要一切癰腫伏龍肝以蒜和作泥貼  
之乾再易或雞子黃和亦可

聞誤

除虛吐血者不宜用以其中有火氣故也  
腫毒盛難消者不得獨用

石灰味辛溫主疽瘍疥癢熱氣惡瘡癩疾死肌  
墮眉殺痔蟲去黑子息肉療髓骨疽

疏○石灰燒青石而成故其味辛氣溫本經  
不言其毒觀所主皆不入湯其爲毒可知矣  
火氣未散性能灼物故主去黑子息肉及墮  
眉也其主疽瘍疥癢熱氣惡瘡癩疾死肌髓



骨疽者皆風熱毒氣浸淫於骨肉皮膚之間  
辛溫能散風熱毒氣且能蝕去惡肉而生新  
肌故爲諸瘡腫毒要藥也辛而燥故又能殺  
痔蟲古方多用合百草團末治金瘡殊勝者  
以其性能堅物使不腐壞且血見石灰則止  
而百草又能活血涼血故也

○古墓中石灰名地龍骨火毒已出燥烈大減  
故主頑瘡癩瘡膿水淋漓及斂諸瘡口尤效

○船油灰名水龍骨得油性之潤復得水氣  
之陰故主金瘡跌撲傷損破皮出血及諸瘡  
癩血風癩瘡也

主治參互

入三仙膏點一切癰疽腫毒輕者可消重者  
勢亦減。普濟方疣痣癩贅石灰一兩用桑  
灰淋汁熬成膏刺破點之。又方去癰疽瘰  
肉石灰半斤麥稈灰半斤淋汁煎成霜密封

趙香  
珍記



每以針劃破塗之自腐落有毒不入湯丸故  
無簡誤

○百草霜乃煙氣結成其味辛氣溫無毒辛主  
散故能消化積滯及下食也凡血見灰則止  
此藥性能止血復能散瘀滯故主上下諸血  
及崩中帶下胎前產後諸病

主治參互

筆峰雜興方胎動下血或胎已死百草霜二

錢櫻灰一錢伏龍肝五錢爲末每服二錢白

湯入酒及童便調下

此杜壬方治橫生倒逆

胎前產後虛損月候不調崩中帶下百草霜

白芷等分爲末每服二錢童子小便醋各少

許調勻熱湯化服不過二服瘥

簡誤

雖能止血無益腸胃救標則可治本則非故  
不宜多服



砒霜味苦酸有毒主諸瘧風痰在胸膈可作吐

藥不可久服能傷人飛鍊砒黃而成畏菜豆冷水入藥醋

煮殺毒用

疏○砒霜稟火之毒氣復兼煅煉本經雖云

味苦酸而其氣則大熱性有大毒也酸苦涌

泄故能吐諸瘧風痰在胸膈間大熱大毒之

物故不可久服能傷人也更善落胎及枯痔

殺蟲

簡誤

按砒黃既已有毒見火則毒愈甚而世人多

用砒霜以治瘧不知內經云夏傷於暑秋必

瘵瘧法當清暑益氣健脾是為正治豈宜用

此大熱大毒之藥如果元氣壯實有痰者服

之必大吐雖暫獲安而所損真氣實多矣初

燒霜時人在上風十餘丈外立下風所近草

木皆死以之毒鼠鼠死猫犬食之亦死人服



至一錢許則立斃若得酒及燒酒服則腸胃腐爛頃刻殺人雖菘豆冷水亦難解矣其於鈎吻射罔之毒殆又甚焉奈何今人用之治瘧是以必死之藥治必不死之病豈不誤哉除枯痔殺蟲用於外傳之藥此外慎毋服之切戒切戒

血 鎊墨主蠱毒中惡血暈吐血亦塗金瘡生肌止

疏○鎊墨釜月中墨也本經無氣味然觀其所主大約與伏龍肝相似而其用則少劣也凡血見灰見黑則止蠱毒惡氣得辛溫則散故本經主蠱毒中惡吐血血暈以酒或水細研溫服亦塗金瘡生肌止血也慎勿入傅面瘡藥中其黑入肉如黥不能去也血暈宜用米醋研服

硃作砂味鹹苦辛溫有毒不宜多服主積聚破



結血爛胎止痛下氣療欬嗽宿冷去惡肉生好

肌柔金銀可為錐藥形如牙硝光淨者良凡用水飛

去塵穢入甕器中重湯煮乾

疏○礪砂乃鹵液所結秉陰毒之氣含陽毒

之精其味極鹹極苦極辛氣溫有毒甄權酸

鹹有大毒能消五金八石腐壞人腸胃生食

之化人心為血其毒之猛烈如此可畏矣其

主積聚結血宿冷者以鹹能入血軟堅辛能

散結溫能除冷故也積聚散則痛自止氣自

下因寒以致頑痰壅結則欬嗽作故暫用以

散之柔金化石之性故能爛胎及去惡肉也

金石見之即化其能生好肌乎此前人之誤

耳

主治參互

普濟方損目生瘵赤肉弩出不退杏仁百粒

蒸熟去皮尖研濾取淨汁入礪砂末一分水



八  
煑化日點一二次自落 白飛霞方鼻中息  
肉礪砂點之卽落此方須入明礬牛黃鉛粉  
象牙末真珠末乃佳 集效方面上疣目礪  
砂少許礪砂鐵鏽麝香等分研搽三次自落  
急以甘草汁浸洗

簡誤

按礪砂大熱有毒之物近出於唐世而方書  
不著古人單服一味伏火作丸子亦有兼硫  
黃馬牙硝葦合餌者不知方出何時殊非古  
法此物雖能攻積聚凝結化有形癖塊然多  
食腐壞人腸胃觀其柔化金銀銅錫及庖人  
煮硬肉入礪少許卽爛可以類推矣惟去惡  
肉及惡瘡息肉目翳弩肉是其所長亦須與  
真牛黃龍腦鉛華象牙末等同用其內服諸  
方雖唐慎微已收附本草末然服必害人命  
悉不敢載一名狄鹽一名北庭砂一名氣砂



一名透骨將軍中其毒者生菜豆研汁一二升飲之畏漿水忌羊血

鉛丹味辛微寒主吐逆胃反驚癇癩疾除熱下

氣上每熱臍攣金瘡溢血鍊化還成

丸光久服通神明

自炒成者佳市中多雜砂土礬紅不堪用

疏○鉛丹卽熬鉛所作黃丹故其味辛氣微寒性應無毒鉛稟先天壬癸之氣得火成丹則又有靈通變化之神其體重而降胃反吐

逆火氣上升也驚癇癩疾心氣虛怯也得潤下鎮重之性則火不上炎熱氣自下心腎得交而前證除矣稟天一所生之氣故能除熱毒及金瘡溢血也止小便利者心與小腸爲表裏心神寧歛則小便自有節也臍攣者卽小兒臍風也風熱入肝則筋自攣急辛寒鎮重能散風熱金液之性能平肝木故主之也久服通神明者以其得先天之氣故能鎮心



安神也今世又用以解散熱毒長肉去瘀治惡瘡腫毒及入膏藥爲外科必用之物

主治參互

單用傅瘡能止痛長肉生肌 入一切膏藥貼惡瘡腫毒 仲景柴胡加龍骨牡蠣湯治傷寒八九日下之胸滿煩驚小便不利譫語身重者鉛丹龍骨柴胡牡蠣黃芩生薑人參桂枝茯苓各一兩半半夏二合半大黃二兩

棗六枚以水八升煮取四升內大黃更煮一兩沸去渣溫服一升 集驗方治吐逆不止碧霞丹黃丹四兩米醋半升煎乾炭火三秤就銚內煨紅冷定爲末粟米飯丸梧子大每服七丸醋湯下 劉涓子鬼遺方小兒癰瘡壯熱不寒黃丹二錢蜜水和服冷者酒服名鬼哭丹 痘癩方痘癩生翳黃丹輕粉等分爲末吹少許入耳內左患吹右右患吹左



子母秘錄小兒重舌黃丹一豆大安舌下

普濟方小兒口瘡糜爛黃丹一錢生蜜一兩

相和蒸黑每以雞毛蘸搽甚效 集玄方金

瘡出血不止以藥速合則內潰傷肉只以黃

丹滑石等分為末傅之 陸氏積德堂方血

風腫瘡黃丹一兩黃蠟一兩香油五錢熬膏

先以葱椒湯洗貼之 集效方遠近腫瘡黃

丹水飛炒黃檗酒浸七日焙各一兩輕粉半

兩研細以苦茶洗淨輕粉填滿次用黃川護

之外以檗末攤膏貼之勿揭動一七見效

簡誤

吐逆由於胃虛及因寒發吐者皆不宜服

鉛味甘無毒鎮心安神治傷寒毒氣反胃嘔噦

蛇蟻所咬灸熨之

疏○鉛稟先天壬癸之氣以生一者數之始

水者物之初故曰天一生水中含生氣為萬



物之先金丹之母八石之祖五金之寶壬金  
爲清癸水爲濁清爲陽氣濁爲陰質陽氣爲  
生陰質有毒範以法象招攝陰陽烹煉得宜  
是成丹藥餌之仙去生氣之初味固應甘潤  
下之性無毒可知心藏神而法火寧謐則安  
妄炎則病重而潤下使水火既濟而不妄炎  
故主鎮心安神傷寒毒氣者卽陽證熱毒也  
先天真水性含生氣而屬至陰故能解之也  
反胃嘔噦者火氣上浮陰陽將離故氣逆升  
而發嘔噦也茲得鎮墜以下之則陽火歸元  
而前病自止矣蛇蝎之毒無非熱氣諸毒得  
水則解故亦主之也五行萬物之中能解一  
切毒氣者無過先天生氣土中冲氣鉛兼有  
之故爲解諸毒之首藥也

主治參互

黑鉛入養正丹治一切上盛下虛孤陽發越



上浮煩躁面赤恍忽驚惕嘔吐反胃等證用此以鎮墜陽氣使火入陰分則上焦得寧而後可以隨證施治 入黑錫丹治一切下元

虛冷陽氣垂絕陰陽將離及沉寒痼冷諸病

聖濟錄治小兒驚熱心肺積熱夜臥多驚

鉛霜牛黃各半分鐵粉一分研勻每服一字

竹瀝調下 普濟方驚風癇疾喉閉牙緊鉛

白霜一字蟾酥少許為末烏梅肉蘸藥於齦

上搯之仍吹通關藥良久便開 聖濟錄治

消渴煩熱鉛白霜枯白礬等分為末蜜丸芡

實大綿裹含化嚙汁又方鉛白霜一兩黃消

石一兩為末每冷水服一錢 喉痺腫痛鉛

白霜甘草各半兩青黛一兩為末醋糊丸芡

子大每含嚙一丸立效 宣明方治口瘡齩

爛氣臭血出不拘大人小兒鉛白霜銅綠各

二錢白礬豆許為末掃之 普濟方梳髮令



黑鉛霜包梳日日梳之勝於染者

簡誤

鉛性沉重未經烹煉癸水之陰質尚有多服能損傷心脾蓋金石與人身氣血異悟真篇云非類難爲巧是已凡脾胃虛寒陽火不足飲食不化下部陰溼諸證法咸忌之

粉錫味辛寒無毒主伏尸毒螫殺三蟲去鼈瘻

療惡瘡墮胎止小便利

一名鉛粉一名胡粉一名官粉

疏○粉錫陶隱居云卽化鉛所作胡粉也其

味辛氣寒無毒體用與鉛相似性善殺蟲故

去伏尸三蟲鼈瘻寒能解熱毒故療惡瘡毒

螫重而下降故能墮胎澀而黏膩故止小便

利甄權主積聚不消炒焦止小兒疳痢藏器

主久痢成疳和雞子白服以糞黑爲度皆爲

其消積殺蟲止痢也 附李時珍云胡粉卽

鉛之變黑爲白者也其用雖與鉛及黃丹同



內有豆粉蛤粉雜之止能入氣分不能入血  
分此為稍異人服食之則大便色黑者此乃  
還其本質所為色壞還為鉛也亦可入膏藥  
代黃丹用

主治參互

肘後方勞復食復欲死者水調胡粉少許與  
之 子母秘錄小兒腹脹或腹皮青色不速  
治須臾死胡粉鹽熬色變以摩腹上 救急

方杖瘡腫痛水粉一兩赤石脂生一錢水銀  
一分以麻油杵成膏攤油紙貼之內消者填  
滿緊縛 備急方陰股常溼胡粉摻之 邵  
真人方黃水膿瘡官粉煨黃松香各三錢黃  
丹一錢飛礬二錢為末香油二兩熬膏傅之  
備急方小兒疳瘡熬胡粉猪脂和塗 集  
簡方妒精陰瘡鉛粉二錢銀杏七箇銅銚內  
炒至銀杏黃去杏取粉出火毒研搽效 聖



惠方翻花惡瘡胡粉一兩臘脂一兩為末鹽湯洗淨傅之日五次 孫氏集效方血風賺瘡官粉四兩水調入盆內以蘆艾燒煙熏乾入乳香少許同研香油調作隔紙膏反覆貼之 千金方小兒丹毒唾和胡粉從外至內傅之 又方瘡傷水溼胡粉炭灰等分脂和塗孔上水即出也 又方蠖螻尿瘡酢和胡粉塗之 直指方發背惡瘡諸癰腫好錫粉

二兩真麻油三兩慢火熬以柳枝急攪至滴水成珠入白膠末少許入瓷器水浸二日油紙攤貼名神應膏

簡誤

胡粉雖能消疔逐積殺蟲止痢然其性冷走而不守脾胃虛弱者不宜用娠婦忌之

東壁土主下部瘡脫肛

疏○東壁土先得太陽真火之氣其氣溫和



其味甘無毒脾主四肢而惡溼下部生瘡溼  
氣侵脾也得陽氣之壯故能燥溼除瘡脫肛  
亦大腸溼熱所致甘溫而燥故亦主之藏器  
止洩痢霍亂煩悶者取其土能補脾胃溫能  
和中也得太陽初氣能祛暑溼之邪故又主  
溫瘧及猝中暑熱攪土漿與之即解

主治參互

甄權法同蜺殼為末傅豌豆瘡一肘後方藥

毒煩悶欲死者東壁土調水三升頓飲之

通變要法解烏頭毒不拘川烏草烏毒用多

年陳壁土泡湯服之外臺秘要肛門突出

東壁土一升研末傅肛門頭出處以長皂莢

炙熟互熨之氣味甘溫性無偏至故不著

簡誤

赤銅屑主賊風反折燒赤銅五斤內酒二斗中

百遍服



疏○赤銅屑日華子云苦平微毒亦能接骨  
理傷功用與自然銅相等第其性有毒耳本  
經主賊風反折者風氣通於肝肝屬木金能  
平之故也藏器曰赤銅屑能鐸人骨及六畜  
有損細研酒服直入骨損處六畜死後取骨  
視之猶有鐸痕可驗朝野僉載云定州崔務  
墮馬折足醫者取銅末和酒服之遂瘥及亡  
後十年改葬視其脛骨折處猶有銅束之也

打熟銅不堪用

銅青平微毒治婦人血氣心痛合金瘡止血明  
目去瘡赤息肉生銅皆有青青則銅之精華淘  
洗用

疏○銅稟土中陰氣以生青則其英華秀出  
於外所結凡銅入地久或沃以鹹酸之味乃  
生青其義可見矣本經氣平無毒然觀今人  
用入吐風痰藥應是酸苦澀之味而氣則微



寒也酸入肝而主斂故能止血合金瘡風熱入肝經則目生膚翳息肉或赤爛淚出苦寒能除風熱則所苦去而目自明矣本經又主婦人血氣心痛者蓋苦能泄結而平則又兼辛散之義也

主治參互

經驗方碧林丹治痰涎潮盛卒中不語及一身風癱用生綠二兩研細水化去石慢火熬

乾取辰日辰時辰位上修合再研入麝香一分糯米粉糊丸彈子大陰乾卒中者每丸作二服薄荷酒研下吐出青碧涎瀉下惡物大效又方口鼻疔瘡人中白一錢銅綠三分研傅之衛生易簡方爛弦風眼銅青水調塗盪底以艾熏乾刮下塗爛處

簡誤

目痛膚翳不由風熱外侵而因於肝虛血少

治爛弦風眼



者非所宜用

井底砂泥作至冷主治湯火燒瘡用之

疏○井底砂稟地中至陰之氣味甘而大寒

者也故本經主湯火燒瘡用又能療妊娠熱

病取傅心下臍及丹田可護胎無失 肘後

方臥忽不寤勿以火照火照之殺人但痛嚙

其踵及足拇指甲際而多唾其面以井底泥

塗其目令人垂頭於井中呼其姓名便甦

丹田

代赭石味苦甘寒無毒主鬼疰賊風蠱毒殺精

物惡鬼腹中毒邪氣女子赤沃漏下帶下百病

產難胞衣不出墮胎養血氣除五藏血脉中熱

血痺血瘀大人小兒驚氣入腹及陰痿不起入藥

煨赤醋淬三次研水飛過用  
畏天雄附子乾薑為之使

疏○代赭石稟土中之陰氣以生本經味苦

氣寒別錄加甘無毒氣薄味厚陰也降也入

手少陰足厥陰經少陰為君主之官虛則氣



怯而百邪易入或鬼疰邪氣或精物惡鬼或驚氣入腹所自來矣得鎮重之性則心君泰定而幽暗破邪無從着矣其主五臟血脉中熱血痺血瘀賊風及女子赤沃漏下帶下百病皆肝心二經血熱所致甘寒能涼血故主如上諸證也甘寒又能解毒故主蠱毒腹中毒也經曰壯火食氣少火生氣火氣太盛則陰痿反不能起苦寒泄有餘之火所以能起陰痿也重而下墜故又主產難胞不出及墮胎也

主治參互

仲景旋覆代赭湯治傷寒汗吐下後心下痞鞭噫氣不除者代赭一兩旋覆花三兩人參二兩生薑五兩大棗十二枚半夏半升甘草三兩水一斗煮取六升去滓再煮取三升溫服一升日三直指方急慢驚風弔眼撮口



搖弱不定代赭石火燒醋淬七次細研水飛  
日乾每服一錢或半錢煎真金湯調下連進  
三服兒脚脛上有赤斑卽是驚氣已出病當  
安也無者不治如慢驚用冬瓜仁煎湯調亦  
妙 普濟方婦人血崩代赭石煨爲末白湯  
服二錢

簡誤

下部虛寒者不宜用陽虛陰痿者忌之

丹鹽味鹹寒無毒主明目目痛益氣堅肌骨去  
毒蠱心腹痛溺血吐血齒舌血出一名胡鹽一名

青鹽

疏○戎鹽稟水中至陰之氣凝結而成不經  
煎煉而生於涯埃坂墳之陰其味鹹氣寒無  
毒入手足少陰經經曰熱淫於內制以鹹寒  
血熱則目痛不明鹹寒能入血除熱故主目  
痛明目也心腹痛者心虛而邪熱客之也吐



血齒舌上出血者火迫血妄行溢出於上也  
鹹主潤下俾火氣不上炎則有坎離交之象  
焉故能主諸證也溺血者小腸熱也心與小  
腸爲表裏心火降則小腸熱自除也經曰熱  
傷氣又曰腎主骨熱則氣散骨消筋緩鹹能  
入腎寒能除熱故主益氣堅肌骨也鹹爲水  
化諸毒得水則解故又能去毒蠱日華子云  
助水臟益精氣除五臟癥結心腹積聚者取  
其入腎及軟堅除熱之功耳

主治參互

仲景金匱方戎鹽湯治小便不通用戎鹽彈  
丸大一枚茯苓半斤白朮二兩水煎服之  
唐氏經驗方風熱牙痛青鹽一斤槐枝半斤  
水四盃煎汁二盃煮鹽至乾炒研日用揩齒  
洗目 普濟方風眼爛弦戎鹽水化點之  
簡誤同食鹽



地漿寒主解中毒煩悶

疏○地漿弘景云此掘地作坎以水沃其中攪令濁俄頃取之以解中諸毒蓋取土為萬物之母諸毒遇土則化故也山中有毒蕈人不識煮食之無不死又楓樹蕈食之令人笑不止惟飲地漿皆瘥餘藥不能救也

主治參互

聖惠方熱渴煩悶地漿一盞飲之 千金方

中暑霍亂不吐不利脹痛欲死地漿三五盞服即愈大忌米湯 金匱方中閉口椒毒吐白沫身冷欲死者地漿飲之 集玄方中砒霜毒地漿調玄明粉服之立解

自然銅味辛平無毒療折傷散血止痛破積聚生邕州山巖中出銅處於坑中及石間採得方圓不定其色青黃如銅不從鑛煉故號自然銅

人藥火煨醋淬七次研細水飛過用

本草經疏卷五

綠君亭



疏○自然銅稟土金之氣以生故其味辛氣平無毒乃入血行血續筋接骨之神藥也凡折傷則血瘀而作痛辛能散瘀滯之血破積聚之氣則痛止而傷自和也大明主消瘀血排膿續筋骨治產後血邪安心止驚悸以酒磨服者可謂悉其用矣寇宗奭云有人以自然銅飼折翅胡雁後遂飛去今人打撲損傷研細水飛過同當歸沒藥各半錢以酒調服仍以手摩痛處即時見效

主治參互

同乳香沒藥麝蟲五銖古錢麻皮灰血竭胎骨作丸煎當歸地黃續斷牛膝牡丹皮紅花濃湯送下治跌撲損傷或金刃傷骨斷筋皆效

簡誤

雷公云石髓鉛卽自然銅也凡使勿用方金



牙其方金牙真似石髓鉛若誤餌吐殺人石髓鉛色似乾銀泥味微甘也凡使中病乃已不可過服以其有火金之毒走散太甚

梁上塵主腹痛噎中惡鼻衄小兒軟瘡

疏○梁上塵乃是空中煙氣結成本經無氣味應是辛苦之物辛能散苦能洩故主腹痛噎膈中惡也體輕而上騰故入肺味辛而清熱故又主鼻衄及小兒軟瘡也一名倒掛塵

一名烏龍尾

主治參互

孫氏集效方喉痺乳蛾烏龍尾枯礬猪牙皂

莢以鹽炒黃等分爲末或吹或點皆妙

法用燈心以鹽中苦鹵浸過入雞子殼中煨

存性取出研細加龍腦香一二分研勻明礬

末五分同梁上倒掛塵五分青魚膽調點入

喉治喉痺咽痛有效



礞石治食積不消留滯藏府宿食癥塊久不瘥及小兒食積羸瘦婦人積年食癥攻刺心腹一名青礞石

疏○礞石稟石中剛猛之性體重而降能消一切積聚痰結其味辛鹹氣平無毒辛主散結鹹主軟堅重主墜下故本經所主諸證皆出一貫也今世又以之治小兒驚痰喘急入滾痰丸治諸痰怪證

主治參互

王隱君養生主論滾痰丸通治痰為百病惟水瀉娠婦不宜服礞石焰硝各二兩煨過研飛曬乾一兩大黃酒蒸八兩前胡八兩沉香五錢為末水丸梧子大常服一二十丸欲利大便則服一二百丸溫水下

簡誤

礞石消積滯墜痰涎誠為要藥然而攻擊太



過性復沉墜凡積滯癥結脾胃壯實者可用  
虛弱者忌之小兒驚痰食積實熱初發者可  
用虛寒久病者忌之如王隱君所製滾痰丸  
謂百病皆生於痰不論虛實寒熱槩用殊為  
未妥不知痰有二因因於脾胃不能運化積  
滯生痰或多食酒麪溼熱之物以致膠固稠  
黏咯唾難出者用之豁痰利竅除熱泄結應  
如桴鼓因於陰虛火炎煎熬津液凝結為痰

或發熱聲啞痰血雜出者如誤投之則陰氣  
愈虛陽火反熾痰熱未退而脾胃先為之敗  
矣可見前人立方不能無蔽是在後人善於  
簡擇耳

麥飯石

疏○麥飯石出自蘇頌圖經附於薑石條內  
因薑石有疔腫之用故引及之其味氣必與  
薑石相似但得火煨醋淬之後復有溫煖收



歛之功昔呂子華秘方麥飯石膏治發背瘡神效取此石碎如棋子炭火燒赤投米醋中浸之良久又燒又浸如此十次研末極細如飛塵鹿角一具連腦骨者二三寸截之炭火燒令煙盡卽止白歛末與石末等分鹿角倍之用三年米醋入銀石器內煎令魚目沸卽下前藥不住手攪熬一二時稀稠得所傾出待冷以鵝翎拂膏於腫上四圍赤處中畱腫

可洩氣如未膿卽內消已作頭卽撮小已潰卽排膿若病久肌肉爛落見出筋骨者卽塗細布上貼之乾卽易逐日瘡口收斂但中膈不穴者卽無不瘥已潰者用時先以猪蹄湯洗去膿血挹乾然後上藥其瘡切忌手觸動嫩肉仍不可以口氣吹風及腋氣月經孕婦見之合藥時亦忌此等初時一日一換十日後二日一換此藥要極細方有效若不細塗



之即痛也煨久亦無效臨用方煨煨過即研若飛塵一二兩可治一癰疽矣

花乳石主金瘡止血又療產婦血暈惡血出陝華諸郡色正黃形之大小方圓無定欲服者當以大火燒之金瘡止血刮末傅之即合仍不作膿潰或名花蓋石

疏○花乳石本經無氣味詳其所主應是酸辛溫之藥其功專於止血能使血化為水婦

人血暈惡血上薄也消化惡血則暈自止矣以酸斂之氣復能化瘀血故傅金瘡即合仍不作膿也

主治參互

葛可久十藥神書花乳石散治五內崩損噴血出升斗用此治之花蓋石煨存性研如粉以童子小便一鍾男入酒一半女入醋一半令溫食後調服三錢甚者五錢能使瘀血化



三十一  
爲黃水後以獨參湯補之按此石性溫味辛  
又加火煨虛勞吐血多是火炎迫血上行於  
藥性非宜除是膈上原有瘀血停凝者乃可  
暫用亦須多服童便獨參湯乃肺熱咳嗽所  
忌尤不宜於虛勞內熱火炎之人戒之戒之  
和劑局方花蕊石散治一切金刃箭鏃傷  
及打撲傷損狗咬至死者急以藥摻傷處其  
血化爲黃水再摻便活更不疼痛如內損血

胎死

入臟腑熱童便入酒少許熱調一錢服立效  
婦人產後敗血不盡血暈惡血奔心胎死  
腹中胞衣不下至死但心頭溫煖者急以童  
便調服一錢取下惡物愈若膈上有血化爲  
黃水卽時吐出或隨小便出甚效用硫黃四  
兩花蕊石一兩並爲粗末以膠泥固濟日乾  
瓦礫一箇盛之泥封口烘乾安在四方磚上  
磚上書八卦五行字炭一秤篋匣從巳午時



自下生火煨至炭消冷定取出為細末甕瓶收貯封固取用無時

簡誤

無瘀血停畱者不宜內服不由內傷血凝胸膈板痛而因火炎血溢以致吐血者忌之

蓬砂味苦辛煖無毒消痰止嗽破癥結喉痺及  
錫金銀用一名鵬砂

疏○蓬砂出於西南番採取煎淋而結亦知

硝石礲砂之類本經味苦辛氣煖無毒然詳其用味應有鹹氣亦微煖色白而體輕能解上焦胸膈肺分之痰熱辛能散苦能洩鹹能軟故主消痰止嗽喉痺及破癥結也寇宗奭云含化嚙津治喉中腫痛膈上痰熱初覺便治不能成喉痺也兼能去口氣消障翳除噎膈反胃積塊瘀肉陰癢骨硬惡瘡折傷及口齒諸病



主治參互

同龍腦香人中白青黛為末傅口舌瘡效  
經驗方咽喉腫痛破棺丹用蓬砂白梅等分  
搗丸芡子大每噙化一丸 集玄方小兒陰  
癩腫大不消鵬砂一分水研塗之大效 直  
指方弩肉瘖突南鵬砂黃色者一錢龍腦香  
少許研末燈草蘸點之

簡誤

蓬砂其性能柔五金去垢膩剋削為用消散  
為能宜攻有餘難施不足此整用之藥非久  
服之劑

鉛霜冷無毒消痰止驚悸解酒毒療胸膈煩悶

中風痰實止渴一名鉛白霜用鉛雜水銀十五  
分之一合鍊作片置醋甕中密

封經久  
成霜

疏○鉛霜乃鉛假汞氣交感因醋以拔其英  
華所結道家謂之神符白雪其味甘酸氣大



寒無毒凡中風驚悸未有不因痰熱所生胸膈煩悶多渴亦火熱炎灼所致甘寒能除熱生津則痰結消驚悸平風自愈也其主解酒毒者亦取其除熱生津之意耳并治吐逆鎮驚去怯黑鬚髮

主治參互

諸方俱見鉛條下

簡要濟眾治室女月露

滯澀心煩恍惚鉛白霜細研為散每服一錢

地黃汁一合調下

十全普救方治鼻衄鉛

白霜為末取新汲水調服一字

簡誤

鉛霜墜痰去熱定驚癇止吐逆皆有奇效然其性極冷非久服常用之物病已即去之胃弱脾虛腸滑者不宜用風寒咳嗽多痰者并忌之

古文錢平治翳障明目療風赤眼鹽鹵浸用婦



人橫逆產心腹痛月隔五淋燒以醋淬用

疏○古文錢其金毒火毒悉去性應平無毒  
而寇宗奭云古錢其銅焦赤有毒不知本草  
內赤銅之毒已微况古錢又多於古穴坑塹  
中得之歷年既久毒性必失甚則有但存形  
質者其味辛氣平平即涼也日赤翳障肝經  
風熱也辛涼能散風熱則翳障赤痛除日自  
明矣婦人生產橫逆者血氣壅塞道路不開  
也心腹痛者亦氣血結聚也月隔者月事不  
來胞脉閉也五淋者衝任熱壅也此藥能走  
下焦陰分散凝滯之氣血開壅塞之道路則  
諸證無不除矣又能主跌撲損傷其為散凝  
滯之藥無疑

主治參互

同自然銅胎骨麀蟲血竭無名異黃荆子沒  
藥乳香狗骨治跌撲損傷及金刃傷神效



青囊錄跌撲損傷半兩錢五箇火煨醋淬四  
十九次甜瓜子五錢真珠二錢研末每服一  
字好酒調隨上下食前後 古方麥斗散治  
一切傷損自然銅煨一兩古文錢煨一兩麝  
香五分爲末每服五分酒下

簡誤

其味辛涼但能治風熱眼有佐以薑汁點眼  
者卽從治之意借其熱以拔出火毒也如肝

腎虛而內障者必不宜用



本草經疏卷五

綠君亭







